

# LA USC DI LADINS - VENERDI' 10 LUGLIO 2020

MANIFESTAZIONS

## »Sportives se nasc su la Dolomites e te Fascia«

*L'è pontà demez la rassegna de rencontres a Poza che ogne lunesc sera auza fora i valores del sport travers la stories de si protagonisc. En lunesc ai 13 de messèl sarà William Basilico e l Fascia Bike*



*William Basilico l'è l protagonist de l'enconter di 13 de messèl.*

Per desvalives egn la protagonistes di evenc da d'istà endrezé dal Comitāt Manifestazion de Sèn Jan l'è stat la stories de crepes e alpinism.

Chest an, te chest istà particulèr olache se ponta via da nef d'ò l bloch de la ativitèdes per via de l'emergenza Covid, «Enjoy Pozza», l comitat manifestazions del comun de Sèn Jan vidà da la presidenta Mara Dorich e col suport de l'assessor Simone Zulian, l'ha dezidù de mudèr.

La coordenadora del projet Virna Pierobon, enciarièda dal comitat, dò sacotanta valutazions l'ha pissà de uzèr fora n tem nef ma autertant bon de contèr stories straordenères e tel medemo temp con reisc fortes tel teritorie e tel lengaz de Fascia e de l'autra valèdes ladines.

L tem cernù fora chest an l'è l sport, con dut l'ensema de valores fogn che i lo caraterisea e che va aldilà del sport medemo, de gran valuta umana e sozièla.

Via per i meis de messèl e aost donca sarà i gregn champions del sport che viventarà la seres da d'istà a Sèn Jan, sportives nasciui e cresciui dal pont de veduda sportif te Fascia o te la Dolomites, opura con n leam a chest raion per la impreses sportives che à segnà sia storia.

Disciplines desche l schi alpin, la roda, l'hockey. Femenes e omegn che con sie empen e sacotenc

sacrifizies à arjont gregn travers sportives a la Olimpiades, ti Mondieù, te Copa del Mond, arà l met de contèr sia storia e sia esperienzes.

A verjer la rassegna de rencontres che jirà inant ensin ai 7 de setember l'è stat l joen Federico Liberatore ai 6 de messèl sul tem «Sciatori si diventa», dapodò ogne lunesc da les 21.15 te tendon de la manifestazions de Poza, opura tel piaz tedant Cèsa de Comun, a se enterzèr sarà William Basilico «Val di Fassa, storie di bike dalla Rampilonga all'EWS» ai 13 de messèl; Stefano Gross «Dall'Aloch a Adelboden» ai 20; Maria Canins Bonaldi «Donna di sport, mito del ciclismo al femminile» ai 27. De aost se taca ai 3 con Cristian Zorzi «Zorro, le medaglie al collo», ai 10 sarà Christian Ghedina «Da Cortina a Cortina», dapodò ai 17 l giornalista Lorenzo Fabiano del Corriere della Sera rejonarà de la endesfida da lejenda anter Francesco Moser e Laurent Fignon e ai 31 de aost Giorgio Pedron metarà al luster i champions de l'Hockey Club Fascia, anchecondi HC Fascia Falcons. Per la dates di 24 de aost e di 7 de setember se speta amò la conferma del ghest.

L Comitāt de endrez ge tegn a sottrissèr che sarà arsegarà l distanziament sozièl tel respet de la normes antiCovid. CRLM